

Anna Soliva-Gartmann, Rueras \*

06.06.1935 + 05.01.2023

Tristezia e regurdientschas ein ils sentiments el temps da cumiau d'ina persuna che nus havein giu bugen. La persuna ha accumpignau nus certs tschancuns da nossa veta e nus dein in sguard anavos seregurdond da buns e menders muments, da trests e da leghers. Bugen laschein nus reviver quels sco per tener anavos la veta dalla persuna. Mo il cumiau ei definitiv ed ei resta a nus veramein mo pli las regurdientschas e «schi ditg sco nus seregurdein vivan nos morts cun nus» sedi ei.

Ils 3 da fevrer ein las restonzas d'Anna Soliva-Gartmann vegnidas surdadas alla fossa. Ella ei morta a Melk en l'Austria en casa tier siu feagl. La stad vargada eis ella aunc stada inagada cheu a Rueras sin viseta, denton stauncla e spossada e bein enqualga ha ella detg. «Ju sun prompta, jeu vi murir.» Forsa era ella sco nus che havein visitau ella, era pertscharta che quei savess esser sia davosa viseta en sia patria. Sia amicabladad, demananza ed attaschadadad ei quei che vegn a restar a nus en buna memoria. Ella gudeva visetas. Ella ch'ei stada prest l'entira veta ustiera ei vivida sia clamada. Disada cun truscha da gliעד ha ella giu breigia en la vegliadetgna da vegnir persula, che las visetas ein sereducidas ed era che sias forzas e pusseivladads muncavan ad ella per sezza far vistetas. «Ju vezza



dis ain a dis ora negina gliud, ju sun persula, quai fetsch'ju vess» scheva ella magari. Sias vischinas, sias amigtas dad anruras, ses enconuschents, eran tgi setratgs naven, tgi en casas d'attempai ni schizun mortas. Aschia eis ella spert sedecidida igl onn vargau da suandar siu feagl Charly on l'Austria nua ch'ella ha anflau in bien da casa cun buna tgira e nua ch'ella sesenteva era bein. Sin ina davosa carta postala digl onn vargau scriva ella: «cun mei va ei bien. Haiel ina media en casa ed ei fan fetg bien. Aschia sundel en buns mauns. Cars salids a tuts, Anna.»

Siu cuors dalla veta ha ella sezza scret: «Sundel naschida ils 6 da zercladur 1935 sco emprem affon da Gion Mar-

tin Gartmann e Catrina Holzer. Ensemen cun mes treis fargliuns havein nus giu ina biala affonza. Las scolas haiel frequentau a Sevgein, a Trin e la secundara a Glion. Miu bab che luvrava a Domat en la fabrica ha priu mei zacontas gadas giu Domat per luvrar en cantina». Quei segi stau igl impuls da sescolar vinavon sin quei secur cun in emprendisadi el Hotel Steinbock a Cuera. Leu ha ella fatg enconuschientscha cun Placi Soliva da Sedrun ch'era leu cuschinier. «Nus havein fatg amicezia, i suenter omisdus a Winterthur e lu maridau igl onn 1956. In onn suenter ei nies emprem feagl Thomas naschius ed igl onn 1960 Charly. Els dus han dau bia plascher a nus. Igl onn 1962 essan turnai ensi e surpriu dils geniturs da Placi l'ustria Alpsu sil pass». Da quei temps ha ella raquintau bia e savens. Ei hagian stuiu luvrar bia, cun agid da bien persual, cun buns e fideivels hosps seigien quels onns i sco da sgular. Il pir seigi denton stau da stuer tarmetter ses dus buobs egl internat a Schluein durant igl unviern. In

pass che ha stuiu esser, «mo che hagi fatg fetg mal».

Vinavon ha Anna scret: «Essan stai 25 onns sil Pass. Sundel stada bugen leu. Igl ei stau in bi temps, fatg atras bia cufflas e lavinas. Hai fatg bia bials viadis cun miu Placi e viu igl entir mund. Igl onn 1989 havein vendiu la fatschentas e secasai en nossa casa a Rueras». Igl onn 2001 ei siu um Placi morts. En ina brev da cumiau scrivian ses fegl: «Era ils grevs temps en Tia veta has ti saviu acceptar suveranamein senza selamentar. Ti has giu il dun da prender tia veta cun levezia. Tia aviartadad, tiu optimismus e tia amicablidad han formau mintga mument da Tia veta. Ti eis stada ina grondiusa mumma! Engraziel fetg per tut tia carezia, per tut il bien che ti has fatg per nus. Nus vein bugen Tei e ti mauncas a nus... mo il prender cumiau fa vieti mal.»

*Cara Anna ruaussa en pasch e sin seveser*

Bruno Berther, Rueras

**PREAVIS**

**Pader Placi a Spescha**

In cor lom sin solas diras

Sera da film cun Gieri Venzin, historicher e cineast

**Sonda, ils 25 da mars 2023, allas 19.00**

en sala Cristalla en Halla da sport e cultura Dulezi, Sedrun

TuJetschVIVAcultura

